

300 cavali; el qual se oferiva, con 6000 paesani, obviar che turchi non passeria, e sariano serati volendo ritornar, *etiam* più, passando, non ritornerano. Et fo mandato a lui uno nostro secretario, Vicenzo Guidoto, ad questo effecto, prometendoli *etc.* *Tamen* nulla fece. Et fo ditto, turchi sul piam di Goricia vendeno bestiami, et li lhorò cavali erano scortegati per il longo camin, et che molti ne amazono, non li potendo condur, e tornono a piedi. *Et dicitur*, su la riva dil fiume esser stà trovati più di 1000 corpi morti; e intisi, ponevano tre homeni uno a presso l'altro, e li tagliava la testa; usando grandissima crudeltà in conclusione.

*A di 8 octubrio.* Vene una nave di Corfù, sopra la qual vene sier Alvixè Loredam, de sier Matio, stato da suo cugnato, ducha di Nichosia, in l'Arzi-pielago; *etiam* zonze un gripo di Candia con malvasie. Or, ditto sier Alvise partì da Modon a di 18, et a di 26 da Corfù. Dice, a di 14 zonse a Modon sier Nicolò da cha' da Pexaro con X galie, et a Napoli andò sier Simon Guoro, l'altro provedador, con 6; et che a Corfù vete il capetanio zeneral, sier Antonio Grimani, con 25 galie sotil et 11 grosse, e havia licentiato le galie di Barbaria e dil trafego, andasseno a lhorò viazi; et che sier Domenego Malipiero, 3.º provedador, era con 5 galie sotil e con le nave armade al Zante; et che trovò el Trivixan, zeneral, a San Piero *in Hieme*. Dil qual, a di 4, si have sue lettere de li; et sier Piero Grimani, fiol dil zeneral, andava dal padre, era su la nave di biscoti, et che a Corfù trovò la nave dil Coresi et quella di Piero da Liesna, erano stà licentiate dal zeneral, *adeo* tutta la terra parlava di tal pazia, di sembrar l'armata nostra, fata con tanta faticha e spesa, dicendo: El fa el pezo che l'puol. Et poi disnar fo pregadi per cosse da mar, molto secrete, e comandato grandissime credenze.

Et per li consieri e savij fu messo una parte, atento che sier Andrea Barbarigo era manchato e lassato X fioli im povertà, che per gratia e benignità di la Signoria nostra, atento li meriti dil padre et dil serenissimo principe avo, sia scritto a Roma, che li sia dato per il pontifice beneficij primi vacanti per ducati 500; e fu presa.

*Da Milano vene lettere di cinque oratori nostri, di 6.* Di l'intrada di la regia majestà, la qual sarà la copia qui soto posta.

*Copia di una lettera scritta per i nostri oratori a la Signoria de l'intrata dil re in Milan.*

*Serenissime princeps etc.*

Questa regia majestà hozi vene a disnar a Cassim. Questa matina semo andati a trovar sua celsitudine, da la qual semo stati acolti et visti *cum* tanta humanità et clementia, honorando le persone nostre per honorar vostra sublimità, continuamente con la bareta in mano, che fece star tutti quelli signori et principi, erano a presso sua majestà, in admiratione. Montati a cavallo, sua majestà volse cavalchar fra nui, Marco et Nicolò, et nui altri drieto quella *immediate*. Da poi seguiva el marchexe de Mantoa, Monferà et Saluzo, et altri ambasciatori. Zonzesemo a la terra, et sua majestà dismontò in un monestier de l'hordene de San Domenego, dove erano reduti tutti i zenthilomeni et primarij cittadini de questo stado. Et intrata sua majestà in camera per vestirse, el sorazonse el signor ducha di Ferrara, qual, intrato a sua majestà, stete *cum* quella alquanto; et, ussito fuora, ussite *etiam* la regia sublimità, vestita de un manto de damaschin bianco, fodrà de vari grisi, sopra una vesta de pano d'oro *cum* bavaro de armelini; in capo una bareta de damaschin bianco, pur fodrata de vari grisi; et montato sopra uno corsiero tuto ornato de panno d'oro, el se apresentò a sua majestà lo illustrissimo domino Zuan Giacomo Triulzi, *cum* i primarij zenthilomeni et cittadini de questa terra, et presentatoli le chiave de la terra; le qual sua majestà recevute, le dete a uno de quelli signori franzosi era a presso de quella, et da poi per el dicto missier Zuan Giacomo li fu presentato do bastoni tutti indoradi, quali sua majestà dete, uno al mareschalcho de Giè, l'altro fu dato a esso sig. Zuan Giacomo. Da poi fu presentata a sua majestà una spada nuda, la qual sua majestà tolse *manibus proprijs*; le qual tutte cosse fu apresentate *cum* molto grave et accomodate parolle. L'ordine de l'incieder era stà ordinato per el suo gran maestro de casa, de hordene de sua majestà, in questo modo: la regia majestà cavalchò solo soto un baldachin d'oro, fodrà de varo, portato per 8 cavali, et i primarij de questa terra. A la staffa se ritrovava 16 zenthilomeni de questa terra, tutti vestiti nobilissimamente. Intorno el baldachin era tutto el collegio de i doctori, in gran numero, vestiti de scarlato, *cum* i suo' bavari et berete de scarlato, fodrate de varo. Drieto sua majestà cavalchò el legato et San Piero *in Vincula*; *deinde* monsignor de Roam, et lo